

**Qanoq iliorluta Nunatsinni isikkamik arsartarnej siuarsarsinnaaneripput inuussutissarsiutigilersinnaanissaanullu periarfissiisoqarsinnaanersoq pillugu apeqquteqaat aallaavigalugu oqallisissiasatut siunnersuut.**

(Inatsisartunut ilaasorta, Aqqalu C Jerimiassen, Atassut)

**Akissuteqaat**

(Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Qanoq iliorluta Nunatsinni isikkamik arsartarnej siuarsarsinnaaneripput inuussutissarsiutigilersinnaanissaanullu periarfissiisoqarsinnaanersoq pillugu apeqquteqaat aallaavigalugu oqallisissiasatut Inatsisartuni ilaasorta Aqqaluk C. Jerimiassen, Atassut siunnersuuteqarneranut Naalakkersuisut aallarniutigalugu qujarusupput.

Kalaallit Nunaani isikkamik arsaanerup siuarsarneqarsinnaaneranut arsartartullu inuussutissarsiutigalugu arsaattartunngorsinnaanissaanut aqutissiuisoqarnissaanut atatillugu siunnersuuteqartoq apeqqutinik soqutiginarunik saqqummiussaqqarpoq.

Nuummi mittarfissuup 28. november 2024 ammarneqarnera mittarfiillu allat marluk naammassiaruaartut Kalaallit Nunatta ineriartornera eqqarsaatigalugu pisoq annertoorujussuovoq. Taannami aqutigalugu nunarsuatsinnut angalasinnaanissarput allanngorujussuarpoq.

Nunanut allanut timmisartumik arlalinnik toqqaanartunik angalasinnaalernikkut arsartartutta nunatsinnut nunatsinnillu angalasinnaanerat ajornannginnerulersussaavoq, tamannalu arsartartutta arsartartoqatigiinnit nunanit allaneersunit malinnaaffigineqarsinnaalernissaanut ajornannginnerulersitsivoq. Najukkani timersoqatigiiffiit peqatigalugit arsartartugut sungiusaasullu ineriartortinneqaqqinnissaanut ikiuisinnaasunik sungiusaasunik, piukkunnaatilinnik immikkullu ilisimasalinnik tikisitsisarnissani mittarfik pingaaruteqartussaavortaaq.

Ukiuni kingullerni timersoqatigiiffiit arlallit Danmarkimi Dana Cup-imi arsaattartut nunanit tamalaaneersut assigiinngitsunik ukiullit peqataaffigisartagaani peqataasalernikuupputaaq. Tamannalu inuusuttunut timersornermik soqutiginninnerulersitsinissamut periarfissaavoq annertoq.

Arsaattarnermut atugassarititaasut ukiuni kingullerni ineriartortitaanikuupput assersuutigalugu ullumikkut arsaannerit ivigaasaaqqani ingerlanneqartalernikuupput. Naalakkersuisut ilimagilluinnarpaat kommunit ivigaasaaqqanik arsaattarfeqalernissamut aningaasaliisimanerat piginnaasanut taamatullu atugassarititaasunut pitsaassutimik kivitseqataasoq. Tamannalu ineriartorneq Naalakkersuisunit Timersoqatigiiffiit Kattuffiat Elite Sport Greenland-ilu peqatigalugit tapersornissaat peqataaffigissavarput. Futsal-ip nunatsinni ineriartupiloornera Naalakkersuisut malinnaavigaat ilimagilluinnarlugulu aamma tamanna arsaattarnermut ineriartortitseqataasoq.

Meeqqat inuusuttullu akornanni arsaanerup ineriartornera pisangalluta malinnaaffigissavarput sutigullu tamatigut pitsaasumik ineriartortinneqarnissaa qilanaaralugu, taamatullu qilanaaraarput partiit arsaattarnermik ineriartortitsinissamut qanoq isumassarsiaqarnerisut tusarnissaat.